



**Departement für Volkswirtschaft und Soziales Graubünden  
Departament d'economia publica e fatgs socials dal Grischun  
Dipartimento dell'economia pubblica e socialità dei Grigioni**

**Realisaziun da la taglia minimala da la OECD en il chantun Grischun**

**Revisiun parziala da la Lescha da taglia per il chantun Grischun**

**(LT; DG 720.000)**

**Revisiun parziala da la Lescha per promover il svilup economic en il  
chantun Grischun**

**(LSE; DG 932.100)**

**Rapport explicativ**

**December 2023 / Versiun curregida dals 22 da favrer 2024**

## **Cuntegn**

<b>1.</b>	<b>Situaziun da partenza .....</b>	<b>3</b>
1.1	Project OECD/G20 davart la taxaziun da l'economia digitala .....	3
1.2	Realisaziun dal project OECD/G20 en Svizra .....	4
1.3	Entradas supplementaras spetgadas or da la taglia complementara.....	5
<b>2.</b>	<b>Basegn d'agir .....</b>	<b>6</b>
2.1	Analisa dal conturn e deducziun dal basegn d'agir da princip .....	6
2.2	Consideraziun commensurada da las vischnancas grischunas.....	8
2.3	Adattaziun da la pratica chantunala da promoziun per interpresas .....	9
<b>3.</b>	<b>Principis dal project.....</b>	<b>11</b>
3.1	Revisiun parziala da la Lescha chantunala da taglia .....	11
3.1.1	Utilisaziun dals meds finansials or da la taglia complementara a favur dal chantun e da las vischnancas .....	11
3.1.2	Repartiziun dals meds finansials or da la taglia complementara sin il chantun e las vischnancas.....	12
3.1.3	Repartiziun da la part da las vischnancas da la taglia complementara sin las singulas vischnancas .....	13
3.2	Revisiun parziala da la Lescha davart il svilup economic .....	13
3.2.1	En general.....	13
3.2.2	Credits da taglia reimbursabels qualifitgads .....	14
3.2.3	Concepziun da la promoziun .....	15
<b>4.</b>	<b>Explicaziuns davart las singulas disposiziuns.....</b>	<b>17</b>
4.1	Revisiun parziala da la Lescha da taglia .....	17
4.2	Revisiun parziala da la Lescha per promover il svilup economic en il chantun Grischun .....	18
<b>5.</b>	<b>Consequenzas finansialas e persunalas da la revisiun .....</b>	<b>20</b>
5.1	Consequenzas finansialas .....	20
5.2	Consequenzas persunalas .....	20
<b>6.</b>	<b>Valitaziun da las consequenzas da la regulaziun.....</b>	<b>21</b>
<b>7.</b>	<b>Entrada en vigur.....</b>	<b>21</b>
	<b>Agiunta .....</b>	<b>22</b>

## 1. Situaziun da partenza

### 1.1 Project OECD/G20 davart la taxaziun da l'economia digitala

Var 140 stadis, tranter quels er la Svizra, èn s'associads al project da l'Organisaziun da cooperaziun e svilup economic (OECD) e da la Gruppa dals 20 pajais industrialisads e pajais sin via d'industrialisaziun ils pli impurtants (G20) per la futura imposiziun da taglia sin interpresas grondas ch'èn activas sin plaun internaziunal (project OECD/G20). Uschia vulan els adattar las reglas da l'imposiziun da taglia sin grondas gruppas d'interpresas a la digitalisaziun ed a la globalisaziun creschenta da l'economia. Il project OECD/G20 sa divide en duas pitgas:

1. Cun la pitga 1 duain vegnir adattadas las disposiziuns internaziunalas vertentas pertutgant l'attribuziun fiscala dals gudogns da las grondas gruppas d'interpresas (imposiziun da taglia en ils stadis da martgà). Ils gudogns na vegnan betg pli suttamess a la taglia sulettamain en ils pajais, en ils quals l'interpresa è domiciliada. Da nov vegn fatga ina part da l'imposiziun da la taglia sin il gudogn en ils pajais, en ils quals ils products vegnan vendids. Pertutgadas èn cunzunt las interpresas grondas (digitalas). Exceptads da la pitga 1 èn ils secturs *prestaziuns finanzialas e produenziun da materias primas*.
2. Cun la pitga 2 duai vegnir introducida ina imposiziun minimala da taglia per las grondas gruppas d'interpresas. Questas uschenumnadas reglas da GloBE (reglas da *global anti-base erosion*) prevesan per las gruppas d'interpresas cun ina svieuta annuala d'almain 750 milliuns euros ina imposiziun minimala da taglia da 15 pertschient sin fundament d'ina basa da valitaziun unitara sin plaun internaziunal. Instituziuns statalas, organisaziuns internaziunalas e d'utilitad publica sco er tsherts fonds da pensiun e d'investiziun na pertutgan betg il sector d'applicaziun da la directiva concernent la pitga 2.

Las lavurs vi da la pitga 2 èn gia bain avanzadas. La realisaziun en differents pajais, en spezial en ils martgads centrals da l'Uniun europeica (UE) ch'èn relevants per la Svizra, è en elavuraziun resp. è pronta. Per ils pajais e cunzunt per las gruppas d'interpresas pertutgadas signifitgescha questa midada in sforz material supplementar, betg mo en vista a las obligaziuns finanzialas supplementaras, mabain er areguard l'implementaziun administrativa da la nova ovra reglamentara.

## 1.2 Realisaziun dal project OECD/G20 en Svizra

En vista a la cumpetiziun internaziunala tranter las plazzas economicas sa vesan la Svizra ed uschia ils chantuns confruntads regularmain cun in basegn da refurma, quai per mantegnair lur cumpetitivitad. Sco ultim è entrada en vigur per exempel l'onn 2020 la refurma fiscala e la finanziaziun da la AVS *RFFA*<sup>1</sup>. Ils ultims svilups da la OECD e dals G20 pretendan danovamain ch'il dretg fiscal d'interpresas en Svizra vegnia adattà e sviluppà vinavant.

Ils 18 da zercladur 2023 han il suveran svizzer e tut ils chantuns acceptà la revisiun da la Constituziun federala da la Confederaziun svizra<sup>2</sup>) per realisar il project OECD/G20 cun ina quota da vuschs affirmativa da 78 pertschient. Uschia è vegnida creada la basa legala per garantir l'imposiziun minimala da taglia da las interpresas pertutgadas en furma d'ina taglia complementara<sup>3</sup>. Ultra da quai po la Svizra far diever da dretgs d'imposiziun da taglia, sch'ina grupp d'interpresas ch'è activa en Svizra na cuntanscha betg l'imposiziun minimala da taglia da 15 pertschient a l'exteriur. Per interpresas che n'èn betg sutmessas a la taglia minimala, na sa mida nagut envers il sistem actual da la taglia sin il gudogn.

La taglia complementara va per 75 pertschient a favur dals chantuns, en ils quals las unitads da fatschenta èn obligadas da pajar taglia<sup>4</sup>. Ils chantuns ston resguardar commensuradamain las vischnancas. La Constituziun federala na fa naginas indicaziuns pli detagliadas davart la commensurabladad da la consideraziun da las vischnancas. A las vischnancas statti liber d'utilisar lur part da la taglia complementara. Ils chantuns decidan – cun excepziun dal fatg ch'els duain resguardar las vischnancas commensuradamain en connex cun la taglia complementara – medemamain independentamain davart l'utilisaziun da lur part da la taglia complementara.

Percunter sto la Confederaziun<sup>5</sup> duvrar sia part da 25 pertschient dal retgav brut da la taglia complementara, suenter la deducziun da sias expensas supplementaras per la gulivaziun da finanzas naziunala (gulivaziun da las resursas NGF) che vegnan chaschunadas da la taglia complementara, per promover ulteriuramain l'attractivitat da la Svizra sco piazza economica.

---

<sup>1</sup> RFFA: Refurma da taglia e finanziaziun da la AVS – introducziun da l'instrument da la patentbox e da la deducziun per custs da P&S sco er ulteriuras mesiras da la politica fiscala a partir da l'onn 2020

<sup>2</sup> Cst.; CS 101

<sup>3</sup> La taglia complementara è ina nova taglia federala supplementara. Ella è limitada a las grondas gruppas d'interpresas che pertutgan il sector d'applicaziun da las novas reglas, q.v.d. ellas cuntanschan ina svieuta d'almain 750 milliuns euros sin l'entir mund e surpassan l'imposiziun minimala da taglia da 15 %.

<sup>4</sup> Art. 197 cifra 15 al. 6 Cst.

<sup>5</sup> Art. 197 cifra 15 al. 9 Cst.

En sia missiva tar il Concluz federal davart ina taxaziun speziala da las grondas gruppas d'interpresas dals 22 da zercladur 2022<sup>6</sup> menziuna il Cussegl federal exemplaricamain mesiras pussaivlas. Latiers tutgan tranter auter ina finanziaziun pli intensiva da las scolas autas, mesiras per sustegnair las stentas da perscrutaziun e da svilup da l'economia, la finanziaziun da start-ups, il far avanzar projects en il rom da la digitalisaziun da l'administraziun che vegn fatga en coordinaziun cun ils chantuns e cun las vischnancas sco er in sustegn finanziel pli ferm per amplifitgar las pussaivladads da la tgira d'uffants.

Fin che las disposiziuns legalas entran en vigur sto il Cussegl federal decretar las prescripziuns necessarias davart l'imposiziun minimala da las grondas gruppas d'interpresas sin il stgalim d'ina ordinaziun<sup>7</sup>. En quest connex sto el suttametter al parlament las disposiziuns correspudentas da la lescha federala entaifer 6 onns suenter l'entrada en vigur da l'ordinaziun<sup>8</sup>. Quest proceder pussibilitescha in'entrada en vigur sin il 1. da schaner 2024.

### **1.3 Entradas supplementaras spetgadas or da la taglia complementara**

Tenor il rapport explicativ dal Cussegl federal dals 28 da zercladur 2023 ch'è vegnì publictà en il rom da la consultaziun tar la «Lescha federala davart las mesiras per distgargiar las finanzas a partir da l'onn 2025» vegnan spetgadas a partir da l'onn 2026 entradas supplementaras or da la taglia minimala da la OECD. Las entradas fiscalas futuras or da la taglia complementara en total e per ils singuls chantuns na sa laschan betg quantifitgar en moda fidada. Il Cussegl federal quinta cun entradas tranter 1,0 e 2,5 milliardas francs per onn.

Sin plaun chantunal èn avant maun mo cifras dal studi da la BSS cussegliaziun per l'economia publica SA, Basilea «*Taglia minimala da la OECD; imposiziun da taglia sin interpresas en Svizra sut il reschim da la taglia minimala da la OECD: Stimaziun da las entradas supplementaras, repartiziun tranter ils chantuns*» dals 21 da zercladur 2022. Quel studi aveva incumbensà la PS Svizra. Ils auturs stiman las entradas supplementaras annualas sur tut ils chantuns sin var 1,585 milliardas francs. Per il chantun Grischun vegnan identifitgadas qua tras entradas supplementaras da 7,3 milliuns francs.

Tenor la valitaziun da la Regenza stoi vegnir partì dal fatg, ch'eventualas taglias complementaras per il chantun Grischun vegnan probablamain ad esser cleramain pli bassas ch'ils 7,3 milliuns francs inditgads. Ina quantificaziun n'è dentant betg pussaivla.

---

<sup>6</sup> Fegl uffizial federal 2022 1700 (curia vista 22.036)

<sup>7</sup> Sa basond sin l'art. 197 cifra 15 al. 1 da la Cst. (disposiziun transitorica tar l'art. 129a Cst.)

<sup>8</sup> Art. 197 cifra 15 al. 8

Tranter auter vegn quai motivà cun la circumstanza, ch'i sa tracta tar il studi da la BSS d'ina uschenumnada calculaziun statica cumparativa che vegn fatga senza resguardar las midadas da cumportament da las gruppas d'interpresas pertutgadas, e che las supposiziuns davart ils svilups da fatschenta d'interpresas dal passà vegnan a vegnir extrapoladas en il futur. Questas supposiziuns da calculaziun na paran betg plausiblas per il Grischun. Sin basa da las interpresas ch'èn pertutgadas actualmain en il Grischun, ston ins quintar mo cun imports marginals, perquai che la grevezza fiscala sin il gudogn per persunas giuridicas è cun 14,77 pertschient bunamain 15 pertschient en il chantun Grischun. Ultra da quai èsi da partir dal fatg, che las gruppas d'interpresas pertutgadas vegnan a desister da mesiras da distgargia fiscala sco la patentbox, la deducziun per la perscrutaziun e per il svilup u ils levgiaments fiscals tenor l'art. 5 da la Lescha da taglia per il chantun Grischun<sup>9</sup> (DG 720.000). I n'èn er betg avant maun infurmaziuns davart il cumportament da las interpresas pertutgadas en auters chantuns. Concludend po vegnir fatg in giudicament mo en quel senn, ch'igl exista senz'alter la pussaivladad che tschertas taglias complementaras vegnan ad ir a favur dal chantun a partir da l'onn 2026. En il decurs da l'onn pon quellas esser suttamessas a grondas fluctuaziuns e n'èn betg planisablas ordavant.

## **2. Basegn d'agir**

Il basegn d'agir per il chantun Grischun resulta d'ina vart da la directiva da la Confederaziun concernent il resguard commensurà da las vischnancas a las entradas fiscalas or da la taglia complementara. Da l'autra vart dovri – suenter l'armonisaziun da la concorrenza fiscala internaziunala per las grondas gruppas d'interpresas – in nov agiustament da la politica dal lieu areguard ils instruments nulfiscals.

### **2.1 Analisa dal conturn e deducziun dal basegn d'agir da princip**

La concretisaziun e la realisaziun dal project OECD/G20 èn suttamessas ad ina gronda dinamica sin plaun internaziunal e naziunal. Questa dinamica sa furma oravant tut tras las grondas malsegirezzas che resultan da l'introducziun e da la realisaziun da la taglia minimala da la OECD. I regia in vast consens che la Svizra ed il Grischun na possian betg restar inactivs en vista als svilups internaziunals. Il basegn d'agir per la realisaziun sin plaun naziunal vegn reconuschì generalmain. Per la Svizra e per il Grischun exista in basegn d'agir direct d'adattar il sistem fiscal a las novas realitads e da garantir che la entradas fiscalas supplementaras resultian en Svizra e betg a l'exteriur. Sche la taglia minimala da la OECD na vegniss betg realisada en Svizra, vegnissi desisti d'entradas

---

<sup>9</sup> LT; DG 720.000

fiscalas senza augmentar a medem temp la cumpetitivad. Senza la realisaziun da l'imposiziun minimala stoi perquai vegnir fatg quint tut en tut cun entradas massivamain pli pitschnas per la Svizra. Ultra da quai ston vegnir evaluadas e – nua ch'igl è inditgà – adattadas regularmain las mesiras che megliereschan la cumpetitivad dal chantun, e quai independentamain da las consequenzas da l'introducziun da la taglia minimala da la OECD.

Il Departament federal da finanzas (DFF) ha publitgà ils 8 d'avust 2023 l'emprim rapport davart las consequenzas spetgadas da la realisaziun da la taglia minimala da la OECD per ils singuls chantuns e davart las mesiras planisadas dals chantuns<sup>10</sup>. Il rapport mussa che tut ils chantuns s'occupan da la realisaziun da la taglia minimala da la OECD e da novas mesiras pussaivlas per rinforzar la qualidad dal lieu. Pervia dal conturn internaziunal dinamic po la gronda part dals chantuns pir skizzar direcziuns pussaivlas persuerter. Il basegn d'agir ch'è vegnì constatà en ils chantuns po vegnir resumà - resguardond il fatg d'esser pertutgà, resguardond la caracterisaziun da las interpresas domiciliadas en il chantun sco er resguardond la tariffa actuala da taglia - sco suonda:

- Intgins chantuns na planiseschan ni adattaziuns tar l'imposiziun da taglia sin interpresas ni autras mesiras fiscalas u planiseschan talas che n'èn betg suttamessas a la taglia (Appenzell Dadens, Berna, Giura, Sursilvania, Vallais, Turgovia). Tar auters chantuns (Basilea-Citad, Schaffusa, Soloturn) n'èsi betg definì per il di da referenza, ils 31 da matg 2023, tge adattaziuns che duain vegnir fatgas.
- Ina grupp da chantuns planisescha mesiras per adattar sporadicamain la tariffa da la taglia sin il gudogn e sin il chapital sco er las mesiras da la RFFA (Argovia, Appenzell Dadora, Genevra, Lucerna, Neuchâtel, Vad).
- Passa la mesadad dals chantuns planisescha mesiras en il rom da las regulaziuns definidas da la OECD (Argovia, Appenzell Dadora, Basilea-Champagna, Friburg, Lucerna, Sursilvania, Son Gagl, Tessin, Turgovia, Uri, Sviz, Vad, Zug, Grischun).

Il rapport mussa che tant adattaziuns en il dretg fiscal sco er adattaziuns da las mesiras da promoziun existentas vegnan evaluadas actualmain en ils chantuns, e quai resguardond las regulaziuns da GloBE en il sector betg fiscal. Las infurmaziuns actualas dals chantuns mussan, ch'en il fratemp vegnan activs per realisar la taglia minimala da la OECD er chantuns che n'avevan anc betg inditgà in basegn d'agir per il di da referenza il matg.

Per las interpresas domiciliadas en il Grischun, per las interpresas che vulan sa domiciliar en il futur en il Grischun sco er sin basa da la grevezza fiscala efectiva sin il gudogn da las

---

<sup>10</sup> Il di da referenza da l'enquista tar ils chantuns è stà il 31 da matg 2023

persunas giuridicas da 14,77 pertschient èn inditgadas mesiras da promoziun en il sectur nunfiscal. In augment da las grevezzas fiscalas effectivas sin il gudogn da las persunas giuridicas sin 15 pertschient n'è betg inditgà. Quest basegn d'agir vegn rinforzà supplementarmain tras las stentas internaziunalas, naziunalas e chantunalas per adattar las mesiras politic-economicas dal lieu.

Per realisar la taglia minimala da la OECD èn vegnids evaluads ils suandants puncts che ston vegnir resguardads e che ston vegnir adattads a la basa legala correspondent:

- Garantir che las vischnancas grischunas vegnian resguardadas commensuradamain e ch'ils interess fiscals dal chantun e da las vischnancas vegnian observads.
- Orientar la pratica da promoziun actuala per interpresas dal chantun a las cundiziuns generalas che resultan tras la taglia minimala da la OECD.
- Segirar l'attractivitat dal Grischun sco piazza economica ed observar uschia ils interess da l'economia publica dal chantun.

## **2.2 Consideraziun commensurada da las vischnancas grischunas**

En il Grischun surpiglia il chantun l'imposiziun da taglia a las persunas giuridicas per las vischnancas. La tariffa da la taglia sin il gudogn importa per il chantun e per las vischnancas mintgamai 4,5 pertschient (ensemen cun la Confederaziun e cun las baselgias chantunalas 14,77 pertschient). Quai vegn er mantegnì uschia sunter l'introducziun da la taglia minimala da la OECD, entant che las interpresas grondas cun entradas da passa 750 milliuns euros èn suttamessas a la nova taglia minimala. Cun il preventiv fixescha il Cussegl grond annualmain il pe da taglia per las taglias sin il gudogn e sin il chapital da las vischnancas. Quest pe da taglia importa dapi il 2017 (onn fiscal) 95 pertschient da la taglia chantunala simpla. Per il chantun importa il pe da taglia correspondent medemamain dapi l'onn 2017 90 pertschient da la taglia chantunala simpla. La differenziaziun tranter ils pes da taglia dal chantun e da las vischnancas è marginala. Las vischnancas èn pertutgadas tuttina sco il chantun d'eventualas distgargias fiscalas. Ellas èn pia da medema moda las chaschunadras d'ina eventuala imposiziun da taglia sut la limita da 15 pertschient. Questa regulaziun n'è nagina obligaziun, ch'ina eventuala taglia minimala da la OECD resp. taglia complementara per il Grischun stoppia vegnir repartida en la medema dimensiun sin il chantun e sin las vischnancas. La Constituziun federala lascha als chantuns ina gronda libertad da concepziun per resguardar las vischnancas en connex cun las taglias complementaras.

Da princip fissi chapaivel, sche las vischnancas da domicil da las gruppas d'interpresas pertutgadas vegnissan partecipadas ad ina taglia minimala da la OECD. Ina repartiziun



correspondenta cuntradi dentant al secret fiscal<sup>11</sup>. En il chantun Grischun vegnan bain main che diesch interpresas en dumonda per ina taglia minimala da la OECD. Sche las taglias minimalas vegnissan repartidas sin las vischnancas da domicil pudess, ins trair conclusiuns directas davart l'interpresa mintgamai pertutgada. In'attribuziun da las entradas or da la taglia complementara a las vischnancas tenor la sedia da l'interpresa è cun quai esclusa.

Per il chantun resulta uschia in basegn d'agir direct per fixar ina clav da repartiziun che resguarda tant ils interess formals sco er ils interess materials dal chantun e da las vischnancas.

### **2.3 Adattaziun da la pratica chantunala da promoziun per interpresas**

En vista a la cumpetiziun internaziunala tranter las plazzas economicas che daventa pli acuta, sa vesan la Svizra ed il Grischun confruntads regularmain cun in basegn da refurma per mantegnair lur cumpetitivitad e per defender lur interess da l'economia publica. En vista a l'introducziun da la taglia minimala da la OECD stoi vegnir examinà, co che la politica dal lieu po vegnir sviluppada vinavant, optimada ed adattada a las novas cundiziuns.

Ina consequenza massiva da la taglia minimala da la OECD per la Svizra e per il Grischun deriva dal fatg, che la cumpetiziun tranter las plazzas economicas vegn ad esser caracterisada en l'avegnir pli fitg da mesiras da promoziun politic-economicas nunfiscalas (p.ex. agids finansials directs, incumbensas statalas) per interpresas. La midada a mesiras da promoziun nunfiscalas e cun quai l'interruptiun da mesiras da promoziun fiscalas metta la Svizra ed il Grischun davant grondas sfidas. Ils stadis commembers da la UE ed ils Stadis Unids da l'America pratitgeschan tradiziunalmain ina pratica da promoziun da la subvenziun directa d'interpresas, quai per cuntanscher avantatgs dal lieu. Cuntrari a quai sa tegnan la Svizra ed il Grischun a la pratica da promoziun dal lieu renconuschida instituziunalmain da la promoziun indirecta dal lieu, che duai crear in conturn ch'è fiscalmain avantagius per compensar la structura dals custs pli auts (custs da lavur e da terren). Questa pratica vegn abolida cun l'introducziun da la taglia minimala resp. cun in'armonisaziun da la tariffa da taglia. Ins sto partir dal fatg che – tant sin plaun internaziunal sco er sin plaun naziunal – i vegnan decididas en l'avegnir ulteriuras mesiras dal lieu en il sector nunfiscal per mantegnair l'attractivitat da la piazza economica.

---

<sup>11</sup> Sa basond sin l'art. 14 dal sboz da l'Ordinaziun davart l'imposiziun minimala da taglia per gruppas d'interpresas grondas (TPV) pon ils art. 102 fin 173 da la Lescha federala davart la taglia federala directa (LFTD; CS 642.11) vegnir applitgads tenor il senn dal dretg processual. La taglia complementara è pia suttamessa a l'obligaziun dal secret uffizial tenor ils art. 110 fin 112 LFTD resp. al secret fiscal.

Malgrà u gist pervi da l'armonisaziun internaziunala da la concurrenza fiscala vegn la cumpetiziun internaziunala tranter las plazzas economicas a daventar anc pli acuta: gia oz vegnan utilisads en numerus auters pajais programs dal maun public per meglierar la cumpetitivitad internaziunala<sup>12</sup>.

Ina reducziun da l'attractivitat fiscala da la Svizra e dal Grischun e las reacziuns da las interpresas, che resultan da quai, han in effect negativ sin las entradas che derivan da quasi tut las taglias sco er sin las entradas che derivan da las entradas or da las assicuranzas socialas. Gist per il Grischun sco piazza economica s'augmenta questa probabilitad, perquai ch'en il Grischun èn per regla domiciliadas interpresas cun process da produenziun che chaschunan ina lavur intensiva ed uschia er gronds custs. La renunzia ad investiziuns en l'amplificaziun ed en il mantegniment da l'activitad economica sco er l'emigraziun resp. la nundomiciliaziun d'interpresas novas èn adina er colliadas cun il mantegniment e cun l'amplificaziun da plazzas da lavur.

Per segirar l'attractivitat dal Grischun sco piazza economica èsi inditgà da sviluppar vinavant la politica dal lieu. Questa politica duai vegnir realisada en moda cunvegnenta, progressiva ed uschè effizienta sco pussaivel en il senn dals interess dal chantun:

1. I duain vegnir prendidas mesiras adattadas per observar ils interess actuals e futurs da l'economia publica dal chantun.
2. Las mesiras dal lieu ch'èn vegnidadas prendidas resguardan ils svilups futurs sin plaun naziunal ed internaziunal pertutgant la politica economica ed èn uschia er persistentas.
3. Las eventualas entradas supplementaras or da la taglia complementara duain vegnir impundidas cumplainamain per las expensas supplementaras che servan al mantegniment da l'attractivitat da la piazza economica.
4. Pertutgant las finanzas duai la taglia minimala da la OECD vegnir realisada en moda uschè neutrala sco pussaivel per las finanzas dal chantun.
5. Adattaziuns ed ulteriurs svilups duain avoir lieu per gronda part sin ils fatgs e sin ils process instituziunals ch'èn sa cumprovads, e duain uschia correspunder a la pratica da promoziun etablida dal chantun.

---

<sup>12</sup> Ils ultims exempels cumpiglian la promoziun da la fabricaziun planisada da semiconducturs tras il concern american Intel a Magdeburg en la Germania da l'ost, che cumipiglian ina summa da var 10 milliardas euros, u las 369 milliardas dollars americans da las subvenziuns che la Regenza dals Stadis Unids ha deliberà en il rom dal *inflation reduction act* durant 10 onns per products e per tecnologias favuraivlas al clima sco autos electricas, pumpas da chalur e cellas solaras, rodas da vent fin ovras atomaras.

6. Cumbain che en emprima lingia èn las interpresas grondas ed internaziunalas pertutgadas da la taglia minimala, na duai betg vegnir realisada ina favurisaziun unilateral da las interpresas existentas, mabain i duain vegnir dads ils impuls (d'investiziun) giavischads per interpresas en il Grischun.
7. Las mesiras da promoziun dal lieu ch'èn vegnidas prendidas s'orienteschan als standards internaziunals ed a las prescripziuns da model. Tar quests standards e da questas prescripziuns fan part per exempel las prescripziuns da model da la OECD/G20 sco er las modalitads da la realisaziun en auters stadis, per exempel en stadis commembers da la UE u en ils Stadis Unids da l'America.

### **3. Principis dal project**

Sin basa dal basegn d'agir descrit qua survart èn necessarias las suandantas revisiuns parzialas per realisar il project OECD/G20:

1. Revisiun parziala da la Lescha da taglia per il chantun Grischun<sup>13</sup>
2. Revisiun parziala da la Lescha per promover il svilup economic en il chantun Grischun<sup>14</sup>

Las duas revisiuns parzialas èn giuridicamain independentas ina da l'autra. Pervia da lur relaziun materiala vegnan ellas dentant tractadas en in project cuminaivel.

#### **3.1 Revisiun parziala da la Lescha chantunala da taglia**

##### **3.1.1 Utilisaziun dals meds finansials or da la taglia complementara a favur dal chantun e da las vischnancas**

La Confederaziun ed ils chantuns repartan las taglias complementaras en ina relaziun da 25 pertschient (Confederaziun) e 75 pertschient (chantun). I vala da fixar sin il stgalim da la lescha, en tge relaziun che las taglias complementaras che vegnan pajadas al chantun, duain vegnir repartidas sin il chantun e sin las vischnancas grischunas. La nova disposiziun transitorica da l'art. 197 cifra 15 al. 6 Cst. prescriva als chantuns, ch'els resguardian commensuradamain las vischnancas en connex cun il retgav brut da la taglia complementara. Ella na fa naginas prescripziuns pli detagliadas en chaussa. La dumonda da la repartiziun commensurada da las taglias complementaras tranter il chantun e las vischnancas sto vegnir giuditgada cunzunt en vista a l'intent da l'utilisaziun da quests meds finansials. La Regenza ha l'intenziun d'impunder ils retgavs ch'il chantun incassescha or da

---

<sup>13</sup> LT; DG 720.000

<sup>14</sup> LSE; DG 932.100

la taglia complementara, en emprima lingia per financiar eventuels pajaments da credits da taglia reimbursabels qualifitgads (QRTC). Da quest diever dals meds finanzials pon profitar er las vischnancas zunt fitg. Il champ da las mesiras pussaivlas per promover il la piazza economica è relativamain vast. Uschia sa laschan menziunar tranter auter mesiras en ils secturs da la furmaziun, da la perscrutaziun e da l'innovaziun, da la digitalisaziun, da l'ambient, da la promoziun da start-ups e da la tgira d'uffants ordaifer la famiglia. Talas mesiras vegnan gia prendidas en ina dimensiun considerabla e vegnan rinforzadas ulteriuramain.

Resguardond l'autonomia communal da las vischnancas duai vegnir desistì d'ina destinaziun fixa da lur part da las taglias complementaras per mesiras da promoziun da la piazza economica u per autras incumbensas. Las relaziuns da las vischnancas èn memia differentas per definir mesiras ch'èn liantas da medema moda per tut las vischnancas. Ina destinaziun fixa giuridica na sa lascha er betg realisar en moda pratitgabla che cumprova il resultat. Sch'i vegnan insumma a resultar meds finanzials supplementars ed en tge dimensiun, n'è dal rest betg definì. Igl è da partir dal fatg, ch'ils eventuels meds finanzials èn suttamess a grondas fluctuaziuns e na pon strusch vegnir budgetads.

### **3.1.2 Repartiziun dals meds finanzials or da la taglia complementara sin il chantun e las vischnancas**

En sia missiva tar il Conclus federal davart ina imposiziun speziala da grondas gruppas d'interpresas dals 22 da zercladur 2022 constatescha il Cussegl federal, concernent la repartiziun dal retgav or da taglia ed en spezial concernent il resguard da las vischnancas, il suandant:

*«Ils chantuns ston resguardar commensuradamain las vischnancas. La disposiziun transitorica na prescriba nagina clav specifica e respecta uschia l'autonomia chantunala. Pussaivla è p.ex. ina repartiziun sco tar las entradas da la taglia sin il gudogn, nua che las regulaziuns chantunals varieschan fermamain.»*

Las mesiras chantunals per promover la piazza economica na van betg mo a favur dal chantun, mabain er a favur da las vischnancas.

Las taglias complementaras che ston vegnir attribuidas al chantun duain – sco explitgà qua survart – vegnir impundidas en emprima lingia per surpigliar eventuels pajaments da credits da taglia reimbursabels qualifitgads QRTC. Resguardond il grond engaschament dal chantun per promover la piazza economica sco er analogamain a la repartiziun tranter la Confederaziun ed ils chantuns, pari raschunaivel e giustificà da divider las entradas da la

taglia complementara en ina relaziun da 75 pertschient a favur dal chantun e da 25 pertschient a favur da las vischnancas.

### **3.1.3 Repartiziun da la part da las vischnancas da la taglia complementara sin las singulas vischnancas**

Sco menziunà qua survast en il chapitel 2.2, pudess ins trair conclusiuns directas davart l'interpresa mintgamai pertutgada, sch'i vegniss fatga ina repartiziun da las taglias complementaras che van a favur da las vischnancas, sin las vischnancas da domicil. Uschia vegniss violà il secret fiscal. Ina tala attribuziun da las entradas or da la taglia complementara a las vischnancas è pia esclusa. Ins sto tscherner ina clav da reserva. Questa clav duai s'avischinar uschè bain sco pussaivel ad ina repartiziun directa a las vischnancas da domicil.

La clav da repartiziun la pli adattada è ina repartiziun en proporziun cun las entradas communalas or da las taglias sin il gudogn da las personas giuridicas. Questa dimensiun vegn applitgada tranter auter en connex cun l'execuziun da la gulfivaziun da finanzas entaifer il chantun per calcular annualmain il potenzial da resursas da las vischnancas. En questa calculaziun vegnan integradas er las taglias sin il chapital. Las datas èn uschia disponiblas e na suttastattan betg al secret fiscal.

En l'administraziun èn vegnidus examinadas e calculadas differentas ulteriuras clav da repartiziun ch'èn da princip realisablas. Latiers tutgan en spezial ina repartiziun en proporziun cun la populaziun residenta, cun tut las entradas fiscalas da las personas giuridicas per las vischnancas (taglias sin il gudogn e sin il chapital), il potenzial da resursas da las vischnancas sco er ina repartiziun cun effect da gulfivaziun a norma da l'index dal potenzial da resursas da las vischnancas. Nagina da questas alternativas na porscha ina repartiziun cun in resultat pli adequat. Questas clav da repartiziun n'han nagin u han mo in connex parzial cun la taglia minimala da la OECD e servissan ad auters intents, senza effectivamain render justia a quels. Plinavant stoi vegnir resguardà qua, ch'i na ston betg vegnir spetgads pajaments auts e regulars sco er pajaments ch'èn planisabels ordavant. En l'aggiunta da quest rapport explicativ èn inditgads ils resultats da la distribuziun.

## **3.2 Revisiun parziala da la Lescha davart il svilup economic**

### **3.2.1 En general**

En il rom da questa revisiun da la LSE duain vegnir cumplettadas spezialmain las mesiras dal chantun a favur da la piazza economica, ch'èn sa cumprovadas e ch'èn reconuschidas

instituzionalmain, e quai cun instruments confurms a la OECD, quai per observar uschia ils interess actuals e futurs da l'economia publica dal chantun. In'attenziun speziala vala qua al mantegniment da l'attractivitat da la piazza economica ed a la cumpetitivitat futura dal chantun. En quest connex propona la Regenza d'introducir l'instrument dals QRTC.

Ils QRTC porschan bain avantatgs supplementars oravant tut per las interpresas ch'èn pertutgadas directamain da la taglia minimala da la OECD. Ils QRTC duain dentant qualifitgar il chantun per il futur en la concorrenza economica, en moda ch'els stattan da princip a disposiziun per tut las interpresas. Ils criteris da promoziun ch'èn vegnids definids da nov concernent la concessiun da QRTC sco er ils principis generals da promoziun da la LSE ston dentant vegnir ademplids.

### **3.2.2 Credits da taglia rembursabels qualifitgads**

Las prescripziuns da la OECD defineschan, quant enavant che las mesiras da promoziun fiscalas e nunfiscalas han in effect sin il gudogn suttamess a la taglia resp. sin la grevezza fiscala d'ina interpresa.

Tenor la pratica actuala reduceschan las mesiras per distgargias fiscalas (p.ex. la patentbox, las mesiras RFFA e.u.v.) la grevezza fiscala efectiva d'ina interpresa e pon pia sbassar la grevezza fiscala efectiva sut la limita da 15 pertschient. Quai po chaschunar in incassament d'ina taglia complementara e maina fa perder tant ils impuls da cumportament per las interpresas (p.ex. per promover l'innovaziun e.u.v.) sco er ils impuls d'investiziun correspundents, perquai ch'ils meds finansials che vegnan mess a disposiziun tras las mesiras da distgargia fiscala ston vegnir impundids per in'eventuala taglia complementara. Las GloBE rules «neutraliseschan» uschia las mesiras per distgargias fiscalas ch'èn sa cumprovasas e ch'èn renconuschidas oz.

Sco instrument «betg nuschaivel» en il senn dals models da las prescripziuns da la OECD valan ils uschenumnads credits da taglia rembursabels qualifitgads (Qualified Refundable Tax Credits, QRTC). Ils QRTC correspundan centralmain a las mesiras actualas da distgargias fiscalas, han dentant – cuntrari a quellas – in character da «subvenziun». Quest character da subvenziun sa definescha suandantamain:

1. Ils QRTC valan sco qualifitgants tras il fatg, ch'els ston esser rembursabels, q.v.d. ch'els ston vegnir cumpensads u pajads ora entaifer in termin da maximalmain 4 onns. In QRTC vegn perquai cumpensà resp. pajà ora independentamain dal gudogn ed er en cas d'ina perdita d'ina interpresa.

2. Tras la caratteristica qualificanta d'in QRTC, ch'è vegnida descritta survar, valan ils QRTC sco entradas e na chaschunan uschia betg ina reducziun da la grevezza fiscala efectiva d'ina interpresa.

Ils QRTC correspundan gia oz a la pratica internaziunala usitada e vegnan gia applitgads en auters pajais, sco per exempel en Germania, en Frantscha, en ils Pajais Bass u en la Gronda Britannia. Ils QRTC han l'intent da promover activitads specificas d'interpresa sin basa da reglas e d'impuls (p.ex. perscrutaziun e svilup, persistenza u promoziuns specificas per la branscha sco er per la tecnologia). La concessiun da QRTC ha pia adina la finamira directa d'ademplier activitads d'interpresa definidas e giavischadas legalmain.

### **3.2.3 Concepsziun da la promoziun**

Igl è previs da promover mesiras d'interpresa giavischadas da l'economia publica cun agid da QRTC. Uschia vegnan accordads ils interess e las pussaivladads da promoziun da las interpresas ed i vegnan dads impuls per innovaziuns che vegnan fatgas en moda interprendenta e che vegnan giavischadas dal stadi. La promoziun è colliada cun differentas premissas resp. differentis criteris. Ils QRTC duain pudair vegnir permess ad interpresas che prestan ina contribuziun impurtanta cun lur mesiras per augmentar la valurisaziun en il chantun, per rinforzar la perscrutaziun, il svilup e l'innovaziun u per meglierar la persistenza ecologica.

#### **a) Augment da la valurisaziun chantunala**

Las interpresas existentas, novas u las interpresas che sa domiciliesschan da nov en il Grischun duain pudair far diever da QRTC, sch'ellas prestan – en consequenza da l'expansiun, da l'installaziun u da la domiciliaziun – ina contribuziun impurtanta per augmentar la valurisaziun en il chantun. Talas mesiras pon resultar cun crear in dumber minimal da plazzas da lavur, cun realisar investiziuns d'ina autezza substanziala al lieu u cun augmentar las entradas fiscalas chantunalas. Questa mesira da promoziun serva tant a rinforzar l'attractivitat da la piazza economica sco er a reducir las grevezzas en connex cun la domiciliaziun, cun l'installaziun e cun l'expansiun d'interpresas. Il criteri d'ina contribuziun impurtanta per augmentar la valurisaziun en il chantun è ademplì, sch'i è vegnida pajada ina summa d'investiziun minimala, sch'i vegn creà ina quantitat minimala da plazzas da lavur u sch'i po vegnir generà substanzialmain in supplement dal substrat fiscal.

#### **b) Rinforzar la perscrutaziun ed il svilup sco er l'innovaziun**

La favurisaziun fiscala da la perscrutaziun e dal svilup (P&S) sco er da l'innovaziun è pussaivla en numerus stadis da la OECD gia dapi decennis (tranter auter tras las

uschenumnadas regulaziuns RFFA, tenor las qualas pon vegnir fatgas valair as expensas per la perscrutaziun e per il svilup). Cun l'art. 12 (projects innovativs) dispona er la LSE gia d'in tal instrument ch'è dentant collià cun subvenziuns.

Sumeigliant sco en l'art. 12 LSE duain vegnir promovidas las interpresas cun agid da QRTC per la P&S sco er per l'innovaziun. Dignas da vegnir promovidas èn las mesiras da las interpresas, cun las qualas i vegn prestada ina contribuziun impurtanta per rinforzar la P&S e l'innovaziun. Sco mesira vegnan en dumonda las expensas en la P&S (custs da persunal), las investiziuns en projects innovativs/process u en la perscrutaziun applitgada sin incarica sco er las expensas per la scolaziun e per la furmaziun supplementara da las collavuraturas e dals collavuratur. La contribuziun impurtanta è ademplida, sche las expensas u las investiziuns èn substanzialas, pia sch'ellas cuntanschan ina tscherta autezza minimala.

### **c) Engaschament en il sector da la persistenza ecologica**

En vista a l'augment da las prescripziuns regulatoricas e da las finamiras politicas èsi en l'interess sco tal da las interpresas d'agir en moda preventiva e d'anticipar a temp ils svilupps. Ma il svilup regular n'è gia daditg betg il sulet motor da la persistenza. Projects da persistenza èn oz in element central da las decisiuns d'interpresa. La gronda part da las interpresas en il Grischun ha percurschi gia dapi pli ditg la necessitad d'implementar praticas durablas per reducir las consequenzas sin l'ambient, per surpigliar responsabladad sociala e per garantir il success a lunga vista. Gia cun il princip general da promoziun tenor l'art. 2 LSE vegni dà paisa al svilup persistent da l'economia publica e dal spazi economic tenor aspects economics, ecologics e socials.

Cun la promoziun tras QRTC duai vegnir mess in focus sin la persistenza ecologica. Uschia vegnan dads impuls per mesiras d'interpresa che valan sco contribuziun per cuntanscher las finamiras en la protecziun dal clima e per obtegnair ina responsabladad d'interpresa pli vasta en il sector da l'ambient. Ils QRTC per las mesiras d'interpresa che gidan considerablamain a megliar la persistenza ecologica, cumpletteschan autras mesiras dal chantun (p.ex. en il sector dal Green Deal) ed han in effect complementar. Sco mesiras stattan en il center investiziuns ed activitads essenzialas en il sector da la persistenza. Latiers tutgan investiziuns en mesiras che accelereschan la neutralitad dal clima, investiziuns en l'economia circulara<sup>15</sup>, en novas tecnologias per evitar emissiuns da CO<sub>2</sub> u però en tecnologias per producir energia regenerabla.

---

<sup>15</sup> L'economia circulara sa qualifitgescha cun duvrar las materias primas en moda uschè effizienta ed uschè lunga sco pussaivel.



## 4. Explicaziuns davart las singulas disposiziuns

### 4.1 Revisiun parziala da la Lescha da taglia

Tegnair quint commensuradamain da las vischnancas pertutgant il retgav da la taglia complementara, sco che quai vegn pretendì tenor l'art. 197 cifra 15 al. 6 Cst., basegna ina regulaziun sin il stgalim da la lescha en il senn formal. En quest connex ston vegnir regladas la cumpart totala da las vischnancas, l'intent d'utilisaziun, la clav da repartiziun per resguardar las singulas vischnancas ed il modus da pajament.

Sco decret legal per questa regulaziun s'impona la LT. La disposiziun che sto vegnir creada da nov, è in decret executiv dal dretg federal en il sectur fiscal e sto vegnir exequida dals chantuns. L'Administraziun chantunala da taglia (ATa) vegn a realisar la nova disposiziun, analogamain a la transmissiun da las taglias sin il gudogn e sin il chapital ch'ella incassescha per las vischnancas. Las datas ed ils indrizz ch'èn necessaris per quai, èn avant maun tar la ATa.

Per la recepziun da la nova disposiziun en la LT è adattada la part 2.6. VISCHNANCAS en il chapitel 2. Taglia sin il gudogn e sin il chapital, e quai directamain suenter l'art. 97a III. Assegnaziun dals meds finansials. Questa disposiziun regla la transmissiun da las taglias sin il gudogn e sin il chapital che vegnan incassadas per las vischnancas, e quai mintgamai suenter l'entrada dals pajaments cun agid da bunificaziuns periodicas sin il conto current da la vischnanca.

### ***Art. 97a<sup>bis</sup> Cumpart da las vischnancas a la taglia complementara da la Confederaziun***

#### Al. 1

L'alineia 1 constatescha che las vischnancas survegnan tut en tut ina cumpart da 25 pertschient da las taglias complementaras che resultan per il chantun Grischun, e quai senza intents fixs resp. per disponer libramain. En consequenza vegnan 75 pertschient da questas entradas a star a disposiziun al chantun. La Regenza ha l'intenziun d'impunder en emprima lingia la cumpart chantunala per mesiras che promovon la piazza economica. Medemamain vegni renunzià da definir in intent legal fix da quests meds finansials per il chantun.

#### Al. 2

Las taglias complementaras che vegnan assegnadas al chantun Grischun, vegn la ATa a transmetter a las vischnancas per ina part da totalmain 25 pertschient en proporziun da las

taglias sin il gudogn ch'èn vegnidas incassadas per ellas, e quai senza intent fix. Questa cumpart da las vischnancas duai vegnir da bun a las vischnancas, analogamain a lur cumpart da las taglias sin il gudogn e sin il chapital tenor l'art. 97a LT, e quai mintgamai suenter l'entrada dals pajaments sin il conto current da la vischnanca. I n'è betg da far quint cun grondas summas. Ina bunificaziun per mintgamai in mez onn para perquai sufficiente e raschunaivla.

La basa da datas concernent las taglias sin il gudogn è avant maun tar la ATa. Sin il stgalim da la lescha na dovri perquai naginas indicaziuns pli detagliadas.

## **4.2 Revisiun parziala da la Lescha per promover il svilup economic en il chantun Grischun**

### ***Art. 3 Instruments da promoziun***

La disposiziun vegn cumplettada cun l'instrument da promoziun dals QRTC.

### ***Art. 4a Credits da taglia reimbursabels qualifitgads (QRTC)***

#### Al. 1

En l'al. 1 vegnan definids ils criteris da promoziun generals. Ils QRTC pon vegnir concedids en moda d'ina unica giada u repetitiva. I na sa tracta pia betg mo d'ina promoziun da singuls projects, mabain er da contribuziuns a mesiras d'interpresa regularas.

Las mesiras d'interpresa che ston vegnir promovidas, ston furnir ina contribuziun impurtanta; u augmentar la creaziun da valurs en il chantun, rinforzar la P&S sco er l'innovaziun ubain meglierar la persistenza ecologica.

Sco mesiras vegnan en dumonda differentas activitads e projects. La creaziun da valurs po per exempel vegnir augmentada tras interpresas novas, domiciliadas u existentas cun stgaffir plazzas da lavur qualifitgadas, cun investiziuns al lieu u cun generar substrat fiscal. La P&S e l'innovaziun pon vegnir rinforzads cun augmentar las resursas da personal, cun investir en process innovativs u cun intensivar la perscrutaziun per incumbensa. En il sector da la persistenza ecologica vegnan prendidas en dumonda mesiras per proteger il clima resp. mesiras per reducir il CO<sub>2</sub>, mesiras per implementar l'economia circulara u mesiras generalas a favur da l'ambient.

Sin il stgalim da l'ordinaziun e/u en las directivas vegni concretisà, cura ch'ina contribuziun impurtanta è avant maun. Quai vegn mesirà a maun da l'intensidad resp. da la dimensiun u da l'effect da las mesiras. En quest connex vegnan fixadas limitas minimalas, p.ex. ch'ina

investiziun sto cuntanscher in import minimal u ch'i sto vegnir stgaffi in tschert dumber da plazzas da lavur.

#### Al. 2

En l'alineia 2 vegni fixà ch'ils QRTC stoppian vegnir scuntrads cun ils debits da taglia da las interpresas pertutgadas. L'import da la promoziun vegn pia deducì dals debits da taglia. Sche la promoziun surpasa il debit da taglia, sto ella vegnir pajada sin basa dal caracter da subvenziun, perquai ch'i n'è betg pli pussaivel da la scuntrar (cf. er cifra 3.2.2).

#### Al. 3

Questa disposiziun prevesa che las vischnancas stoppian vegnir tadladas al lieu da l'interpresa che duai vegnir promovida cun QRTC (vischnancas cun cumpetenzza fiscal), e quai avant la decisiun da promoziun da vart dal chantun. Il dretg resp. l'obligaziun d'audiziun è inditgà, perquai che las vischnancas sa participeschan la finala als QRTC.

La participaziun da las vischnancas (cun cumpetenzza fiscal) sco er la dimensiun da lur participaziun als QRTC vegnan regladas en la frasa 2 da l'alineia 3. La participaziun vegn fatga analogamain a l'art. 5 LT (facilitaziuns fiscalas) en la dimensiun da l'import che vegn scuntrà cun il debit fiscal correspondent da las interpresas pertutgadas. Quai signifitga a medem temp che mo il chantun surpiglia ils pajaments dals QRTC (che na pon betg vegnir scuntrads). Areguard la participaziun da la vischnanca vala – pervia da la disposiziun da l'art. 5 LT che vegn applitgada conform al senn – il secret fiscal tenor l'art. 122 LT.

#### **Art. 32 Regenza**

En l'alineia 2 vegn reglada la cumpetenzza definitiva (e cun quai er esclusiva) da la Regenza concernent la concessiun da QRTC (sunter avair tadlà las vischnancas cun cumpetenzza fiscal) tenor il nov art. 4a. Questa cumpetenzza cumpiglia er eventuels pajaments da QRTC concedids che na pon betg vegnir mess sut ina reserva da credit.

#### **Midada en in auter relasch: Art. 25 LFC**

Per questa revisiun parziala daventi necessari da midar l'art. 25 da la Lescha da finanzas dal chantun Grischun<sup>16</sup>.

Uschenavant ch'ils QRTC vegnan scuntrads tenor l'art. 4a LSE cun ils debits da taglia da las interpresas pertutgadas, vegnan els cudeschads netto, q.v.d. ils QRTC ch'èn vegnidadas scuntradas cun ils debits fiscals, vegnan cudeschads tenor il princip net. Areguard la

---

<sup>16</sup> LFC; DG 710.100

participaziun da las vischnancas als QRTC è uschia garanti in diever analog a la participaziun da las vischnancas als levgiaments fiscals tenor l'art. 5 LT. Perquai ch'ils QRTC èn formalmain contribuziuns, stuessan ils QRTC scuntrads vegnir cudeschads brutto, senza questa midada en la LFC.

## **5. Consequenzas finanzialas e persunalas da la revisiun**

### **5.1 Consequenzas finanzialas**

#### **a) Chantun**

Pervia da l'introducziun da la taglia complementara da la Confederaziun èsi da far quint cun tschertas entradas per il chantun Grischun. 75 pertschient da questas entradas duain vegnir attribuidas al chantun e 25 pertschient duain vegnir transmessas a las vischnancas. Las entradas fiscalas che pon vegnir spetgadas supplementarmain, na sa laschan betg quantifitgar (cf. chapitel 1.3). Ils meds finanzials che van en favur dal chantun, duain vegnir impundids en emprima lingia per finanziar ils eventuels pajaments ch'èn necessaris en il rom da la promoziun cun agid da QRTC. Uschenavant ch'ils QRTC concedids vegnan scuntrads cun debits fiscals, stat a disposiziun – cun ils QRTC – in'alternativa a l'instrument existent da promoziun dals levgiaments fiscals tenor l'art. 5 LT. Da quai na dastgassan resultar naginas grevezas supplementaras per las finanzas dal chantun. Correspudentamain n'èsi da far quint en il resultat ni cun ina grevezza supplementara per las finanzas dal chantun ni cun in levgiament per las finanzas dal chantun tras la revisiun da la LT e da la LSE.

#### **b) Vischnancas**

La cumpart da las vischnancas or dals retgavs da la taglia complementara da la Confederaziun per il chantun Grischun duai importar 25 pertschient. Per definir la repartiziun da quests meds sin las singulas vischnancas è prevista l'entrada da las taglias sin il gudogn. Perquai ch'ils retgavs da la taglia complementara na sa laschan betg quantifitgar, na po la cumpart a favur da las vischnancas betg vegnir concretisada pli detagliadamain. La participaziun da las vischnancas als QRTC vegn fatga analogamain als levgiaments fiscals tenor l'art. 5 LT. Per las vischnancas na resultan tras quai nagins custs finanzials supplementars.

### **5.2 Consequenzas persunalas**

#### **a) Chantun**

La ATa dispona da las datas, dals indrizzs e da las resursas persunalas ch'èn necessarias per transmetter a las vischnancas lur cumpart da las taglias complementaras mintga mez onn suenter l'entrada dals pajaments resp. per la bunifitgar sin il conto current da la vischnanca.

L'execuziun da la promoziun cun agida da QRTC vegn fatga da l'Uffizi per economia e turissem (UET) e duai vegnir concepida en moda uschè simpla sco pussaivel. La finamira è quella da tegnair en egl ils custs administrativs e da trair a niz las structures e las experientschas ch'èn avant maun sin basa d'auters instruments da promoziun. Resguardond l'utilisaziun da sinergias cun las structures da promoziun actualas sin basa da la LSE e da la Nova politica regiunala da la Confederaziun pon ins partir dal fatg, ch'ils custs supplementars per l'execuziun, ils quals resultan cunzunt cun examinar propostas e cun preparar decisiuns tras la Regenza, possian vegnir garantids cun 0,5 plazzas supplementaras a temp cumplain.

b) Vischnancas

Il project n'ha naginas consequenzas persunalas directas per las vischnancas.

## **6. Valitaziun da las consequenzas da la regulaziun**

La revisiun da la LSE na cuntegna naginas disposiziuns regulatoricas restrictivas, mabain regla la promoziun chantunala cun agid da differentas mesiras sco QRTC per rinforzar il Grischun sco piazza economica e las interpresas en il chantun.

Il project ha la finamira da promover ils acturs da l'economia cun instruments orientads a l'impuls, en moda che quels acturs sa preschentan sezs sco petents per contribuziuns da promoziun e profitan uschia financialmain. Sin basa dal caracter da promoziun da las mesiras proponidas che pon vegnir applitgadas sin basa facultativa dals acturs, vegni desisti d'ina valitaziun da las consequenzas da la regulaziun (VCR).

## **7. Entrada en vigur**

La revisiun parziala qua avant maun duai entrar en vigur anc l'onn 2025, quai per pudair tegnair minimalas las consequenzas per las interpresas e per pudair crear segirezza giuridica gia durant l'onn fiscal 2025.

## Agiunta (Versiun curregida dals 22 da favrer 2024)

Repartiziun da la cumpart da las vischnancas a las taglias complementaras en proporziun cun las entradas communalas da las taglias sin il gudogn, en cifras absolutas ed en pertschients (onn fiscal 2021).

Vischnanca	Taglias sin il gudogn		Vischnanca	Taglias sin il gudogn	
	en francs	en %		en francs	en %
Alvra	334 819	0,5%	Mesauc	100 403	0,1%
Andeer	137 712	0,2%	Muntogna da Schons	17 736	0,0%
Arosa	765 478	1,1%	Sursaiassa Mundaun	110 380	0,2%
Avras	20 828	0,0%	Puntraschigna	829 298	1,1%
Bravuogn Filisur	139 182	0,2%	Poschiavo	718 084	1,0%
Bever	81 632	0,1%	Razén	178 478	0,2%
Panaduz	6 744 100	9,3%	Valragn	119 999	0,2%
Bregaglia	527 540	0,7%	Runtgaglia	1811	0,0%
Breil	361 560	0,5%	Rossa	6434	0,0%
Brusio	1 089 038	1,5%	Giuvaulta	60 826	0,1%
Buseno	7998	0,0%	Roveredo (GR)	352 999	0,5%
Calanca	24 723	0,0%	Val Stussavgia	68 213	0,1%
Cama	51 194	0,1%	Sagogn	39 905	0,1%
Castaneda	6517	0,0%	Samedan	1 213 897	1,7%
Cazas	332 394	0,5%	Samignun	248 026	0,3%
Schlarigna	638 638	0,9%	San Vittore	386 289	0,5%
Cuira	14 268 173	19,6%	Santa Maria en Calanca	1 902	0,0%
Churwalden	181 617	0,2%	S-chanf	111 127	0,2%
Cunter en il Partenz	13 510	0,0%	Scharàns	133 539	0,2%
Tavau	3 487 352	4,8%	Schiers	409 947	0,6%
Mustér	344 873	0,5%	Schluein	150 400	0,2%
Domat	10 640 994	14,6%	Schmitten (GR)	11 519	0,0%
Tumleastga	139 355	0,2%	Scuol	857 185	1,2%
Falera	50 090	0,1%	Seewis	165 063	0,2%
Favugn	212 586	0,3%	Seglias	201 990	0,3%
Farera	24 178	0,0%	Segl	303 552	0,4%
Fideris	35 351	0,0%	Silvaplana	663 745	0,9%
Fläsch	241 817	0,3%	Soazza	66 034	0,1%
Flearda	4836	0,0%	San Murezzan	5 818 240	8,0%
Flem	1 050 124	1,4%	Sufers	13 758	0,0%
Furna	5554	0,0%	Sumvitg	141 320	0,2%
Farschno	74 988	0,1%	Surses	841 814	1,2%
Grono	427 179	0,6%	Tumein	166 093	0,2%
Grüsch	1 256 640	1,7%	Tusaun	686 181	0,9%
Glion	1 155 042	1,6%	Trimmis	572 001	0,8%
Jenaz	40 742	0,1%	Trin	164 418	0,2%
Jenins	46 954	0,1%	Trun	121 230	0,2%
Claustra	1 392 364	1,9%	Tschappina	6455	0,0%

Vischnanca	Taglias sin il gudogn	
	en francs	en %
Küblis	154 535	0,2%
La Punt-Chamuesch	218 618	0,3%
Laax	435 311	0,6%
Landquart	3 102 145	4,3%
Lantsch	94 143	0,1%
Lostallo	102 337	0,1%
Lumnezia	199 106	0,3%
Luzein	91 717	0,1%
Madulain	55 347	0,1%
Maiavilla	751 633	1,0%
Malans	417 706	0,6%
Masagn	11 933	0,0%
Medel (Lucmagn)	47 128	0,1%

Vischnanca	Taglias sin il gudogn	
	en francs	en %
Tschiertschen-Praden	40 521	0,1%
Tujetsch	207 999	0,3%
Vaz Sut	467 228	0,6%
Urmagn	4302	0,0%
Val Müstair	447 030	0,6%
Val	334 839	0,5%
Valsot	131 295	0,2%
	1 130	
Vaz	888	1,6%
Zernez	457 278	0,6%
Ziràn-Reschen	78 095	0,1%
	1 129	
Zizers	933	1,6%
Zuoz	306 044	0,4%
<b>Total Grischun</b>	<b>52 039 327</b>	<b>100%</b>